

大方廣佛華嚴經論卷第三十七 多七

唐方山長者李通立造

◎第七會在三禪天說十一地法門其文未
來

◎第八會在普光明殿說十定法門

十定品第二十七

此品佛自說十定之名普賢說十定之用以
明佛根本智是體普賢差別智是用故明一
切施為不離根本智之大定體故以是義故
還於根本智普光明殿中說寂用之門

將釋此品約作五門分別○一釋會來意○
二釋欲說此會重叙摩竭提國初成佛之所
由○三明何因緣故在此普光明殿中說此
十一品經○四明次第釋十一品之大意○
五明依品釋文

○第一釋會來意者以從此普光明大智殿
中起信以不動智為昇進修行至十地十一
地道滿行周至於佛果不離本智是故此會
須來明不移因也為時不移智不移行不移
因果一體故還教善財見慈氏慈氏還令却
見文殊及入普賢身是也

○第二釋欲說此會何故重叙摩竭提國初
成佛之所由者經云爾時世尊在摩竭提國
阿蘭若法菩提場中始成正覺於普光明殿
入剎那際三昧者明初成佛及四十九年中
所轉法輪并從天下降總不出一剎那時不
移不遷故恐後衆生失其本意妄生遷移故
須重叙明始末無時可遷故此明三世諸佛
一切衆生總同一箇不遷之體從初信進修
行經過五位總不移初時歲月日時及佛根

本智法故

○第三明何因緣故在此普光明殿說此十一品經釋曰爲明初會菩提場始成正覺是佛舉自始成之果勸修第二會普光明殿明是如來大智自果所居之報宅說十箇智佛

以不動智佛爲首以爲信進修行之門令初發菩提心者從此普光明大智宅起信進修行畢竟不離如來本智本行本時還成本佛萬事依舊故於此十地後在於本信心處說此十一品經用明因果依本時日歲月總依本故故於此處說十一品經此十一品經總明成佛之際所有境界故即是明能發菩提心者自成佛故無異初會中毘盧遮那佛故依樣做修一如本故爲約智無時十方一切古今諸佛總與如今始發心者一時成佛故

多七

二

以智照之可見情識聞之即迷是故表依本如是故還於本處說佛果始終之門故以表法界體中始末同際說也此乃約實論之不順凡情之教說多劫也

○第四明次第釋十一品之大意者 一明

十定品是古今一切諸佛寂用徧周無時之

大體也 二明十通品是古今諸佛普光明

智利生自在及報業之神通徧周 三十忍

品是十方古今諸佛自體無作法身一切法

無生隨行之忍門 四阿僧祇品 五隨好

光明功德品是明佛果所述二愚之法以此

二品經是如來自說 六如來壽量品是一

切諸佛隨衆生根性長短所現不同之壽而

自報命與虛空之齊年 七菩薩住處品是

佛果攝衆生之分界明菩薩行門常不斷故

八不思議法品明一切十方古今諸佛智德難思非情識之測度 九如來十身相海品明佛報身依正二果難量 十普賢行品明十方一切古今諸佛共所行自利利他之行周故 十一如來出現品明五位修行者昇進位滿自佛出興出世入纏二行圓滿文殊是主出纏智慧普賢是主入俗行周於此品中二行圓滿故令二人自相問答說此出現之門已上十一品經大意如是一一隨文別釋更當重明大綱總明十一地已後佛果位中所行法則亦是一切菩薩一切衆生總不離此定體而無遷易此時分故明時不遷也

○第五明依品釋文者將釋十定一品約作五門分別△一釋品來意△二釋品名目△

三何故此之一處三會重重△四釋此處三度重叙初成正覺摩竭提國△五隨文釋義△一釋品來意者明此十一地前已說進修行行及智用差別已滿此佛果普光明智明五位法界自體寂用重重無礙文明昇進因果修行終始明時法不遷故此品須來又明一多純雜同別自在故此品須來又明十地菩薩自知未具普賢行不見普賢身故此品須來如此品自具明也

△二釋品名目者明此品如來自說十種定名故因說法而立其名此定乃是古今一切諸佛恒常之法令諸五位菩薩皆同得之一切衆生亦同此體普賢說用明佛是體普賢是用

△三何故此處三會重重者明信心及定體

并離世間品普賢常行此等三事總是如來
普光明智一體因果并普賢菩薩佛果後恒
行總是普光明一箇智用始終因果時日歲
月總無時體以此三會重重總一時有也非
是如世情所見去已更來故如三會重重一
時一會有此三種之法事故或以三世遠近
劫作九世相入重重不礙故爲不離普光明
之智無始無終無不印故無終不徹故三世
劫海總一時故五位因果亦不出此之定體
也

△四明釋此一處三度重叙初成正覺在摩
竭提國者明此一部經有五重因果其五者
何 一如佛初成道在菩提樹下示成正覺
所集神天等衆是一重佛因果也 二於普
光明殿中說佛自成因果令諸後學信進修

行即出毫中之光及衆是也 三說此十定
品等十一品經明諸菩薩信進修行經過信
住行迴向十地十一地等六位自行滿周所
成之佛果此十一品經是 四離世間品是
一切諸佛皆自成佛果後恒以自己果行常
行利生亦名爲利世間品不可作遠離之離
此品名目恐將悞矣譯經之士或可妄詳佛
意於中取意亦有義通如此四段經文品初
皆云爾時世尊在摩竭提國阿蘭若法菩提
場中始成正覺者明說一部之經以菩提智
無前後際一時說故非如情量有前後古人
云重會三會普光明殿者意非然也非但不
移剎那際說此一部之經亦乃從兜率天降
神乃至入涅槃亦如之也乃至三世無盡劫
佛亦一時不出此一剎那際齊成佛故一切

衆生於本無時之內妄生多劫延促之相覺已元無故今此段經文意明菩提智上無延促時日往來之相故總云在摩竭提國始成正覺以智照之可見凡情思之即迷乃至昇天諸會皆云不離菩提樹下普光明殿而昇忉利夜摩等故以菩提根本智體性自徧周無表裏中間長短延促大小去來等見故五法界品是一切諸佛之所共果凡聖共同不離法界大智慧無限德用圓滿之果一切諸佛以此法界大智慧而成正覺亦名普光明大智慧殿故以此五段經總明一真無礙大智無始終之無限經卷量等十方一切境界於一刹那際誦持悉徧亦名普眼經也意明說此一部經及出世涅槃總不出此一刹那際法界之果此法界品是菩提智境究竟

之果此乃都該一部也

④第五隨品釋義者約分二義④一長科經意④二隨文釋義

④一長科經意者於此品中長科爲十一段

○第一爾時世尊已下至所謂無相有五行

半經明當十一品經之序分

○第二隨文釋義從爾時世尊在摩竭提國

者此云不害國亦名聰慧爲依此國人聰慧

故以人得名又摩者云不竭提者云至爲此

國將謀兵勇鄰國敵不至以主將立名又云

摩者大也竭提體也云此國最大爲五印度

之大體故以此國是闍浮提之處中以是如

來示成正覺明處中道義故又明大悲無害

義故又表大悲普利不偏化故皆如初會中

說阿蘭若法如初會已釋始成正覺者明於

兜率天下降神受生說法入涅槃總不離始
成正覺剎那際三昧之時故此經四品之內
皆共同有此言明普光明大智體無時分明
其殿體是智報境以智成名以境智無二所
居之殿體皆舍三世多劫不屬時收無古今
去來之體所有衆生自業現量三世之事皆
現其中不屬遷變移時之相如來所見一切
衆生三世無限業報及心所緣以此普光明
智恒現在前十方世界纖毫之事無不知見
爲普光明大智與一切衆生及等虛空無限
境界同一體性故能一切無不知也以智淨
無障故又剎那際諸佛三昧者明三世古今
同一時故一剎那者會無三世生滅時也此
剎那之時爲教化衆生說法會古今之名言
以智實論猶無此體故以無此剎那之時能

舍三世古今一切劫時總同一故以六相門
觀之可見諸佛三昧者明一切如來久已情
塵見亡恒與智俱以一切智自在神通力現
如來身清淨無礙無所依止者以一切智是
根本智無功用也自在神通者明根本智恒
無體性而能普現隨根之身設一切法而無
失時名爲神通力也亦名現如來清淨之身
一時總釋總明從根本智隨一切衆生起無
礙廣大用故無所依止者明根本智無體性
故爲根本智無體性故方能圓照十方成廣
大功用故無有攀緣者明以智境寂用非是
虛妄緣故住奢摩他最極寂靜者明根本智
寂用自在境智俱真功用俱寂起唯法起寂
唯法寂十方萬法無事不真故云最極寂靜
奢摩他者此云定也明此定是佛根本智無

作大體應根大用之寂用故是諸佛根本智
體用大自在定故明此會總是諸佛果中根
本智作用也具大威德者明佛十力四無畏
十八不共法悉自在若有見聞如來皆念敬
發心悉歸伏故餘如文自具隨宜出興不失
於時者宜堪見聞應時不失故至恒住一相
所謂無相者此已上五行半經明歎佛成道
智德竟已下列眾如下更明

○第二與十佛刹微塵數已下至諸善根行
有三十六行半經明列菩薩大眾分釋義中
約分三段 一從與十佛刹微塵數菩薩已
下至無住解脫有五行經明歎諸菩薩志德
分 二其名曰已下至無邊慧菩薩有九行
經有三十箇菩薩同名為慧明三空禪定解
脫門中所生智慧同名為慧分此已上明三

空解脫禪定中一解脫門中具生十種慧三
空中有三十種慧知見差別三空者無相無
願無作空也如是三空門任運發生此三十
種慧以表無盡故今三十箇菩薩同名為慧
者是 三念莊嚴菩薩已下至同修菩薩諸
善根有二十二行半經有七十箇菩薩各各
隨行別名列眾分已上七十箇菩薩明前三
空解脫已終以七覺行華常處生死善覺悟
一切眾生行故此明十地道終常入生死方
便行周今欲成普賢門故故以十佛刹微塵
為數量者一菩薩皆具如是十徧周行是
故前歎德中無不皆灌頂位即十地位也文
云獲諸菩薩普見三昧明以其十地智眼普
見眾生根欲差別故大悲安隱一切眾生者
以自十地道滿不離方便三空七覺方便行

華引接舍識是入普賢行故故於此品以三昧力三求推覓普賢者明三昧雖有慈悲是出世心多以此不見十一地之位普賢入俗利生之門三求推覓方見普賢者明從十地昇進入普賢行果之位成普賢寂用自在門故是故下文以如意摩尼珠王能隨所求及與物同色不失自珠之德明常以如來自果一切智王不壞菩薩種種方便之行隨諸衆生種種樂欲皆隨引之使令得樂又明雖成八地已後乃至十地十一地及佛位而常不壞七地已前三空七覺諸方便行故是故列衆之內以菩薩名數表之使易解故都舉十佛刹塵爲數量者明一一菩薩總具如是行徧周故是故淨名經云雖成正覺轉於法輪而不捨菩薩之道是菩薩行此之十定列

衆之位總是已成十地出世智慧之衆不捨七地已前諸助道門以利衆生故亦是一切菩薩從初發心不離此定體信進修行至於果滿不遷時故此品之初以叙如來初成正覺之意明說此四十品經及出生滅度時日總不遷始終一際故法本如是故非是如來神通使然約智境實論不隨妄情所說多劫以智照之可見所列前後五位之法及衆各以隨位菩薩一時頓彰明智法界無始末也總以此十定爲體此品初一段叙分及列衆歎德畧舉大意和會始終於中文義隨行隨法立菩薩名約此法行之名如前畧舉十佛刹塵所表以實而論無有盡極但以根本智爲佛自果餘差別智中一切法總是菩薩行故故以十佛刹微塵爲數量

○第三爾時普眼已下至自在解脫有十六行半經明普眼菩薩白佛問普賢道德諸菩薩修幾三昧神通變化而得自在及如來教令請普賢菩薩演說三昧自在分釋義中約分四段 一爾時普眼已下至願垂哀許有多七 三行經明普眼菩薩起問普賢菩薩道德所行法門分 二佛言普眼已下至令汝心喜有一行經明佛許問分 三普眼言已下至無有休息有四行半經明正問普賢及大眾三昧行門多少分 四佛言善哉已下至自在解脫有八行經明如來歎普眼所問及示普賢所在并歎普賢之行及勸普眼令請普賢說十三昧分餘如文自具

○第四爾時會中諸菩薩眾已下至使其然耳有八行半經明諸菩薩眾聞普賢菩薩名

得不可思議無量三昧分釋義中約有十法多七

一大眾得聞普賢菩薩名便獲無量三昧

二大眾得三昧已現前得見無數諸佛

三大眾得如來十力同如來性 四大眾獲福 五大眾神通具足 六大眾尊重普賢

渴仰欲見 七大眾悉皆周徧觀察 八大眾竟不覩見普賢身座 九推佛威所持 十推普賢自力然也大意明十信已後十地已前以普賢行成法身及根本智得出世中差別智已成十一地中以法身根本智純成處生死中無限大用普賢門與一切眾生妄念齊等故同想用隨彼解脫故以是如來令想念普賢經云諸菩薩得如來力者即十力也同如來性者即法性身也大意明從十地十一地昇進佛果位至此方終尊重普賢渴

仰欲見者明昇進普賢行故將十地智成並
賢差別智直至出現品始齊故如彼品自有
所表如善財見彌勒菩薩同一生之佛果却
令見文殊憶念文殊便聞普賢名及入無量
三昧自見其身入普賢身是其樣式一同此
普光明殿中說十信心今至佛果不移因位
及具佛果後普賢行位滿離世間品是佛果
後普賢行云周徧觀察不見普賢及所坐之
座者明從初十信十住十行十迴向十地自
已乘普賢行昇進多求如來解脫悲智出世
間心兼修以成佛自在無作道圓滿已自見
徧周故如十地佛果後普賢行及所有三昧
純是善入世間無求出世佛果故以將兼修
悲智出世佛果三昧三求不見純是大悲無
有自利之行即不相見故以十地佛果已前

行普賢行有自利利他之心以求出世解脫
故以十一地行普賢之行不求自己解脫純
是利生之行故以十一地已前助顯根本智
明於自解脫道已滿足無所希求故於十一
地但爲饒益一切衆生無蘊積已自功故是
故以將十地已前自利利他普賢行求十一
地中普賢行未及見故以此是故大衆周徧
觀察竟不得見普賢身及座故審諦觀察以
智思惟可見餘如文自具

○第五爾時普眼已下至是故汝等不能見
多七
耳有十一行經明諸菩薩入三昧力欲見普
賢徧求不見如來爲說普賢志德甚深汝等
不能得見分何故不見普賢爲明十地菩薩
得出世智慧增上所有三昧皆出世智慧以
是不見普賢是十一地行門常在世間出世

心亡寂用自在以出世三昧不相應故以是不見釋義中分爲四段 一爾時普眼菩薩已下至今何所在有一行餘經明普眼問普賢菩薩所在分 二佛言已下至初無動移有一行半經明如來示普賢所在分 三是

多七

十三

時普眼及諸菩薩已下至其身及座有兩行半經明普眼及諸菩薩重更觀普賢菩薩猶未能見分 四佛言如是已下至不能見耳有六行經明如來爲普眼等歎普賢菩薩志德甚深入師子奮迅定汝等不能得見分經

云入師子奮迅定者明入十地果後普賢行總是無畏自在定故明以無邊想念同衆生行故明大用自真不待念故師子明無畏自在也奮迅者明普賢菩薩恒徧十方普作用定而常行等十方世界無有一衆生而不徧

濟根堪可利而不失時故名奮迅定猶如師子一時奮迅全分身毛一時普震明普賢菩薩常居大用定海任智徧周一時普用等衆生行無失時故不待念故普徧大用利衆生無休息故無始及今同一念故無古今故法如是行故意明大用而常寂是奮迅義得無上自在用者於大用中恒徧用利衆生全定無別止息不同十地已前昇進有出世心故入清淨無礙際者明普賢智量等虛空無根不悉知故無行不同利故生如來十種力者明如來十種智力是普賢行生又教化衆生成佛十力皆由普賢願力起故以法界藏爲身者以根本智身及差別智身性自徧周量等一切衆生心行無不含容皆爲佛事故於一毛孔徧容十方凡聖國土無不總含以

智無表裏中間之際量故本如是故一切如來共所護念者為與如來同根本智為大作用故於一念頃悉能證入無差別智者明普賢菩薩於十方衆生界示成正覺度衆生方便之行示現一念成佛等事亦明始終以無差別智體論之無盡劫總是一念一切衆生於一念中自作無盡劫生死之見若以達理智明觀以無盡劫便為一念無差別智故如是相應便與古今三世一切諸佛一時成佛故以無分別智印印三世時體本齊無先後際故明十地菩薩猶有出世心在猶迷十一地入纏之行故不能得見者使昇進菩薩存自力能不滯前十地位故餘如文自具如師子奮迅三昧者於十方世界普同一切衆生想念作用而成熟之大用而無作是奮迅義

是三昧義就大用而論無別止息故

多七

十四

○第六爾時普眼菩薩已下至求請得見普賢菩薩有三十二行經明菩薩大衆三稱普賢菩薩名殷勤求請欲得見普賢菩薩分釋義於此段中復分為七段 一爾時普眼菩薩已下至俱亦不見有三行半經明普眼菩薩以十千不可說三昧求覓普賢亦不能見分 二時普眼菩薩已下至悉皆不見有三行經明普眼菩薩從三昧起白佛不見普賢菩薩身語意業及座分 三佛言如是已下多七至究竟邊際有十一行經明佛為普眼稱歎普賢三業甚深不可以能出能入三昧能見分 四善男子已下至無空過者有三行半經明佛為歎見聞親近承事普賢菩薩利益無空過分 五爾時普眼已下至頭頂禮敬

可三行已下經明普眼等及諸菩薩皆渴仰
普賢三稱南無頭頂禮敬分 六爾時佛告
普眼已下至即當得見普賢菩薩有六行半
經明佛更勸普眼等大衆更致禮敬徧想法
界推求普賢菩薩如對現前分 七是時已
下至得見普賢菩薩有一行半經明普眼及
諸菩薩大衆依勸勅更加禮敬普賢知時欲
爲現身分 已上三十二行中七段經不見
普賢菩薩意明普眼等諸菩薩以出入三昧
不得見普賢三業及座境界故舉幻術文字
中種種幻相所住處喻明幻術文字之體了
無處所如何所求不可將出入三昧處所之
求去彼沈寂生滅却令生想明想念動用自
體徧周用而常寂非更滅也以是普賢以金
剛慧普入法界於一切世界無所行無所住

知一切衆生身皆非身無去無來得無斷盡
無差別自在神通比明任物自真稱之爲神
不爲不思不定不亂不來不去任智徧周利
生自在知相應現名之爲通萬法如是無出
入定亂方稱普賢所行三業作用及座如十
地菩薩座體但言滿三千大千世界之量比
普賢座量量等虛空一切法界大蓮華藏故
明知十地菩薩智量猶隔以此來昇此位如
許乖宜入出如許不可說三昧之門猶有寂
用有限障未得十地果位後普賢菩薩大自
在故故三求普賢三重昇進却生想念方始
現身及說十三昧境界之事意責彼十地猶
有求於出世習在於世間生死境界未得等
於十方任用自在以此如來教令却生想念
去彼十地中染習出世淨心故此明十地緣

真俗出世餘習氣惑故已上意明治十地菩薩緣真俗二習未亡寂亂二習未盡於諸三昧有出入習故未得常入生死猶如虛空性無作者而常普徧非限量所收一切衆生及以境界以之爲體普賢之智猶如虛空一切衆生以爲生體有諸衆生自迷智者名爲無明普賢菩薩隨彼迷事十方世界對現色身以智無體猶如虛空非造作性無有去來非生非滅但以等虛空之智海於一切處啓迷智無體相能隨等法界虛空界之大用故豈將十地之位諸菩薩以出入三昧有所推求云何得見是故如來爲諸菩薩說幻術文字求其體相有可得不求幻之心尚不可得如何有彼幻相可求是故將出入三昧及以求心而求普賢大用無依善巧智身了無可得

是故如來教諸菩薩却生想念殷勤三禮普賢菩薩方以神通力如應現身明智身不可以三昧處所求爲智體無所住無所依故若想念願樂即如應現化無有處所依止故猶如谷響但有應物之音若有欲求即無有處所得佛言普賢菩薩今現在此道場衆會親近我住初無動移者明以根本智性自無依名爲現在此道場故爲能治有所得諸見蘊故以無礙總別同異普光明智與十方一切諸佛大用體同名爲衆會故無邊差別智海一時等用不移根本智體無依住智名爲親近我住初無動移故云稱南無者明歸命信順故約法以南爲南爲南中虛以虛無故即明南爲日南主心以心達虛無之理即心智明故云南無表歸命信順虛無之理智故

是故善財南方詢友者義亦如然龍女南方成佛義亦如之但達虛無之理智十方總南無若執諸法作實有者十方總北故餘如文自具

○第七爾時已下至三藐三菩提有十九行半經是普賢菩薩為眾現身分何故得見普賢菩薩為存想念是以見之以迴體從用故是普賢身也以明想念皆為佛用故普見一切眾生亦佛用也釋義中分為三段 一爾時普賢菩薩已下至示現一切三世諸佛有七行經明普賢菩薩如應現身分 二是時普眼已下至一切諸佛有兩行半經明菩薩大眾得見普賢菩薩歡喜如見十方一切諸佛分 三是時已下至三藐三菩提有十行經明諸菩薩信解力普賢菩薩本願與雲供

養光明普照息多七三惡趣令諸菩薩入普賢行分如普賢菩薩如應現身即見故將心出入三昧求即不得見明無出入智不可作出入三昧求故自非位合道同智自會矣想念而見且是如應現身故然後方會其本身也餘義如文自具意明無依住智是普賢之大體如應現身是普賢之大用

○第八爾時普眼菩薩已下至歎不可盡功德九行半經明普眼菩薩以十種住法歎普賢菩薩十種廣大所住之法分釋義明普眼歎普賢十種廣大住如來歎普賢十廣大功德其義如文稱歎

○第九爾時如來告普賢菩薩已下至咸皆樂聞有四五行經明令普賢菩薩演說十種三昧分釋義中分為八段 一爾時如來

已下至當得出離有四行半經明佛令普賢說十大三昧分 二何者爲十已下至無礙輪大三昧有六行經明如來先自說十三昧名分 三此十大三昧已下至當說現說有一行半經明此三昧十方三世諸佛共所同多七說分其三昧名如來自說者意明如來是三昧之體令普賢說三昧之功用者明普賢是三昧之用以明佛果位中體用圓滿故此約體名佛用是普賢此位會體用自在故 四若諸菩薩已下至亦名一切法自在有四行半經明佛歎若聞此三昧愛樂修行名得佛自在分 五此菩薩已下至普了一切佛所說有九行半經明修學此十三昧者得於一切法無所著自在善巧轉佛法輪分 六此是諸菩薩法相門已下至嚴淨一切世界門

有五行半經明佛歎修此十三昧能入十種法門分 七若菩薩入此三昧已下至示現種種廣大神通有十二行半經明佛歎若入此三昧得獲大方便利用示現成佛不捨修菩薩行分 八是故已下至成皆願聞有一行半經明如來勸令普賢說此十三昧德用自在分其中文義如經自明如此十定品已後十一品經意以十地中所得出世大悲智成處世大悲智令差別智圓滿自在方成普賢行具足以出世悲智是佛果處世差別智悲是普賢行是菩薩道至出現品二行方終 〇第十爾時已下有十段經正說十種三昧作用之功分其文列後

△初普光明三昧中約分四門一釋三昧名二明三昧之體用三舉三昧之境界四隨文

釋義 一釋三昧名者何故名爲普光明三昧三者正也昧者定也識心不現名之爲昧正智徧周名之爲普照迷破惑名之爲光法無不達名之爲明 二明三昧之體用者此三昧明以法身根本智爲體十種無盡智爲用多以此義故佛自說三昧之名普賢說三昧之用 三明舉三昧之境界者於此初三昧中畧舉境界以三千大千世界爲一蓮華現身徧此蓮華之上結跏趺坐於其身中復現三千大千世界其中有百億四天下 一四天下現百億身 一身入百億百億三千大千世界於彼世界 一四天下現百億百億菩薩修行 一菩薩修行生百億百億決定解今百億百億根性圓滿 一根性成百億百億菩薩法不退業然所現身非一非多入

定出定無所錯亂如是後後倍倍增廣具如經說此是初三昧之境界意明身土重重重重相入徧周廣大無盡限故 四隨文釋義者於此段畧舉十義一普賢菩薩承如來旨說此三昧不自已功旨者意也二重舉三昧名三舉菩薩十種無盡智四明如是菩薩能發十種無邊心五明是菩薩有十種入三昧六明十種入三昧善巧智七舉羅睺羅阿修羅王不壞本身現變化身喻八明菩薩深達心法如幻法門九明比丘觀察內身不淨不壞本身如故多喻十明菩薩住此三昧觀察法身見諸世間及世間法普入其身如上修學普光明三昧以觀法身根本智爲體以十無盡智爲用以發十無邊心爲所行之行以十種入三昧差別智爲三昧同別自在之力以

十種入三昧善巧智令三昧身一多佛刹衆
生刹現在身內不廢自身常復如故復於身
內現無量身度衆生及供養諸佛如下文云
住此三昧觀察法身見諸世間普入其身於
中明見一切世間及世間法於諸世間及世
間法皆無所著爲以法身性自無內外大小
中邊量故法如是見故法如是無著故爲從
法身無相理所現世間及世間法皆如影幻
體故爲世間及世間法皆法身一味無二相
故所有報境皆如影像重重不礙故如羅睺
羅阿修羅王者明能攝日光令世生惱以羅
云攝睺云惱也阿修羅云無天無天妙戲故
於中化事如經自明

△第二妙光明三昧者於此段中四義如前
一釋三昧名二明三昧體用如下自明三昧

三昧之境界四隨文釋義 一釋三昧名者
爲明法身理智體淨能現妙光以立其名
二釋三昧之體用者明此三昧還以根本智
爲體幻智爲用 三明三昧之境界者以入
三千大千世界微塵數三千大千世界於一
一世界中復現三千大千世界微塵數身乃
至一一身放三千大千世界微塵數光具如
經說乃至菩薩身中能現一切聖凡國土更
相照現重重相入等是此三昧之境界具如
經說 四隨文釋義者復分爲二一長科經
多意二隨文解釋 一長科經意者於此段中
長科爲十段。一佛子已下一行經是普賢
菩薩告衆重舉三昧之名分。二佛子此菩
薩已下至種種諸法亦不壞滅有十一行經
明入三昧境界廣狹身土照現互相涉入光

影重重不雜亂分。三佛子譬如日出已下至亦不離水有八行經明以日光照現七寶山及大海水及山間以此日光影更相照現影像重重無盡光影喻分。四佛子菩薩摩訶薩已下至恒不捨離有五行經明如是菩薩住妙光廣大三昧不壞世間相不壞真性二俱不住二俱不壞分。五佛子譬如幻師已下至本日不滅有七行經明以幻師幻作日月年歲長短不同不壞本日喻分。六菩薩摩訶薩已下至不壞彼多世界有十七行經明菩薩入此妙光大三昧能一多世界更互相入各不妨礙分。七何以故已下至是名住大悲法者有十一行經明菩薩住無我法於諸法自他境界身之及心無所妨礙分。八佛子已下至無退轉故有六行半經明

此菩薩以不可數世界善知無數衆生差別菩薩趣入差別佛處處出興皆現自身於彼一一佛所修行諸行而身彼此無去來能同異自在分。九如有幻師已下至後不亂初有五行半經明以幻師喻菩薩實智所生如幻喻分。十菩薩了知一切智幻故已下至下有二十行半經明入此妙光明大三昧得智幻門自在分。四隨文釋義者此一段以根本無作智性自徧周以如影智顯現諸境自他相入一多自在由根本智故多入一中猶如影智一現多境各身色相狀差別故如世界所因者今生修是來世因世界建立者明各各世界立法則故世界同住者一世界中有多類衆生同住光色世界者或有衆生於佛光中住故如此日月星是帝王及人

中衆生共業所化精光昇上復有天住居其中故往來者於虛空中持轉往來此菩薩悉知如八部神名如初會中已釋補特伽羅法者數取趣明數取惡法趣於苦果摩納婆法教儒童法餘如經自具

△第三次第徧往諸佛國土神通三昧者於此段中約有三門一釋三昧名二釋三昧體用三隨文釋義 一釋三昧名者何故名爲徧往諸佛國土神通三昧爲此三昧以理性自性徧周即智用自體徧周以智用自體徧周即神通徧周此明約理智自體徧周以如幻智應物動寂依根本智恒無來往彼此延促以此立名爲徧往諸佛國土神通三昧 二釋三昧體用者此三昧以法性身爲體以根本智起如幻智爲用此如幻智如空谷

多

三十四

響應物成音自無體故以此二智以法爲體但有德用而無所依乃至一切衆生心本來如是故但爲智自無性不能自了逐境成迷故以止觀二門照之迷解依本此約法身爲止體約觀十二緣生成智體用明定能發慧觀能起智 三隨文釋義者二義如前一長科經意者於此段中長科爲四段○一佛子已下至神通三昧有一行半經明普賢重舉三昧之名分○二佛子此菩薩已下至於究竟有十六行半經明入三昧延促自在無所分別於諸法不忘失分○三譬如日天子已下至亦復如是有三行半經明舉日天子照臨四天下晝夜無生滅喻分○四佛子已下至善巧智有一行半經明都舉已上總結其三昧之名分已上文義自具不煩更釋

△第四清淨深心行三昧於此段中三門如前 一釋三昧之名者何故名爲清淨深心行三昧以菩薩已修空無相之理智得身如理智徧周之身起前理智徧周之身以善巧智加行深心供養隨所供養一切諸佛香華三五蓋等十事而心不壞法身智身無作無想是故以立其名 二釋三昧之體用者以法身根本智爲體起方便善巧智興十事供養等衆生數佛爲用 三隨文釋義二義如前一長科經意者於此段中科爲四段○一佛子已下一行經明普賢菩薩重舉三昧之名○二佛子此菩薩已下至不分別如來出世及涅槃相有十八行半經明以香華蓋等十事供養等衆生數諸佛分○三佛子如日中陽燄已下至皆是心想之所分別有七行經

明舉日中陽燄喻菩薩得知如來出興滅度分○四佛子此三昧已下至善巧智有十行經明入三昧如夢中所見境界憶念不忘爲人善說喻分 二隨文釋義者其義如文但入觀者善得其宜先須入無思無心定得法身之理稱虛空之性方可於根本智方便起智興供養心起用須得自在稱理智而爲之若也但修空無相法身即於智不能起用若但一向生想不見無相法身即純是有爲一依此十定次第方便一一經文自具明矣

△第五知過去莊嚴藏三昧於此段中三門如前 一釋三昧名者何故名爲知過去莊嚴藏大三昧此菩薩入此定中能知過去諸佛出現劫刹諸佛出現法門以嚴自心根本智具差別智以此成名爲前之三昧與其供

養於定中須知劫刹諸佛出興之次第法門

二釋三昧之體用者以根本智為體知劫

刹次第差別智為用已下如文 三隨文釋

義者三輪者神通記心正教是三輪清淨明

此三昧得神通善記不忘善說諸法如歌羅

邏者此云薄酪謂初受胎如薄酪自餘如文

自具

△第六智光明藏三昧者明此菩薩能知未

來一切諸劫中所有諸佛若已說法若未說

法皆悉能知故智光明藏者不離一念含三

世劫智名之為藏餘義如文自具於中八部

王等名依初會已釋名此不表法但以供養

恭敬法故親近如來

△第七了知一切世界佛莊嚴三昧者明此

菩薩能徧入十方一切世界見一切諸佛所

多七

三十六

有教化莊嚴悉能見盡及承事供養及所聞

法普入諸趣等總盡故因立名也於中文義

經自具明

△第八一切衆生差別身三昧者明入此三

昧能現佛身等衆生差別身皆隨其類現故

立其名也又能入同異順逆三昧故以立其

名餘義如文自具

△第九法界自在三昧者明此菩薩於自身

一一毛孔中入三昧自然能知諸世間及知

世間法及十方虛空界中一切世間法悉皆

知盡乃至佛菩薩大衆亦皆知盡何以故以

智稱法界故以智無中邊大小量故如虛空

故智體性明白故於一毛孔中虛空無大小

量即等虛空界悉能徧知十方世界一切境

界此不可以情識籌量知當可以亡思方便

定顯發之後理智現前方可堪爲此乃定盡
想亡無思無心以無作智印方會故名法界
自在三昧不在情作任智徧知故名法界自
在此經云如蟲食芥子孔中虛空無損減以
無思之智可見以思知之者即乖身邊見盡
即十方與身量同一性無表裏故情存即隔
如無熱惱大龍王宮流出四河者准經說香
山頂上有阿耨達池其池四方各流出一河
東面私陁河師子口中流出金剛沙東入震
旦國便入東海南面恒伽河從象口流出銀
沙流入南印度便入南海西面信度河從牛
口流出黃金沙流入信度國便入西海北面
縛芻河從琉璃馬口流出琉璃沙入波斯拂
林國便入北海其池縱廣五十由旬隨方面
口各一由旬於中表法經自具明優鉢羅華

此云青蓮華波頭摩華此云赤蓮華拘物頭
華此云小白華其華未開時華葉郁蹙然因
立其名芬陁利華此云百葉白蓮華如阿那
婆達多龍王者阿者無也那婆達多者熱惱
也言此龍永離龍中之熱惱故於中文義表
法一一如經自具

△第十無礙輪大三昧輪者譬如輪王千輻
金剛輪轂輻輳悉圓滿明壞生死行圓表
此菩薩智慧萬行神通道力滿衆生界斷衆
生惑悉圓滿故明自己佛果已成菩薩智慧
願行無有休息不離一念滿三世劫不離毛
孔等周十方法界衆生界悲智行雲一時普
覆是故名無礙輪三昧摩那斯龍王者摩那
者意也斯云慈謂此龍王興雲降雨從慈心
起故

△第十一爾時普眼菩薩白普賢菩薩已下
直至四十三卷末明普眼菩薩問普賢菩薩
如是菩薩何故不名佛不名十力分伊羅鉢
那象王住金脊山者伊羅鉢那此云香葉以
於寶窟邊多有香葉樹以此爲名又以化作
多七三十三頭一一頭有六牙一一牙上化作七
二十八池一一池化作七蓮華以取能化蓮華其葉
香潔因此爲名住居第一金山之脅以知帝
釋欲遊行時此没而天上出送帝釋至園遊
觀時化其自身與天人相似帝釋還宮還作
象身送帝釋還宮便於天上没於寶窟中出
此舉喻明此菩薩雖已成佛位不壞方便行
也如彼象王雖能化身作天而常不失象之
本位自餘廣義如經備文
多七已上十定有十一段文意明從初發心成道

始終出生入涅槃總以此剎那際爲體乃至
古今一切諸佛亦總同時成佛故有情延促
生約真無終始又明此一會十一品經總明
至隨位佛果不壞方便行普賢之道如十信
已來乘如來根本智起普賢行願并教化衆
生及自資自智轉令明淨如作十度鍊真金
喻者是亦不離此定體今至十一地已去自
智鍊磨已終即乃純是利益衆生普賢之行
故此十定品和會從初發心來及無始來諸
佛成佛時却不遷佛果及普賢方便行無始
終時却身心作用滿十方不出毛孔時不離
剎那不遷故一切古今三世歲劫皆以此十
定品該收衆生迷之妄作延促迷解還源此
十定爲本體不延促之常道本來如是
大方廣佛華嚴經論卷第三十七

